

ČETIRI POSLANICE

أربعة رسائل



ODLIKE MEDINE

PROPISI HADŽDŽA I UMRE

PROPISI HADŽDŽA ZA ŽENE

POTREBNE DOVE I ZIKR

البوسنية



الكتاب التعاوني للدعوة والإرشاد وتوعية الجاليات في شرق جدة

جدة - طريق مكة القديم - كيلو ١٢ خلف شركة الراجحي المصرفية ص. ب : (١٠٦١٣٧) هاتف : ٢١٢٢٨١ فاكس : ٢١٢٢٨٢ (تحويل : ١١١)
فاكي : ٢٢٤٠٢٩٨ التل : ٢٢٤٠٢٩٩ (رقم الحساب العام : ٧٠٧٤٠٠) شركة الراجحي المصرفية فرع : ٢٣٨



**UDRUŽENJE BOŠNJAČKIH STUDENATA
ISLAMSKOG UNIVERZITETA U MEDINI**

ČETIRI POSLANICE

**ODLIKE MEDINE
PROPISI HADŽDŽA I UMRE
PROPISI HADŽDŽA ZA ŽENE
POTREBNE DOVE I ZIKR**

1427. H./2006. G.

Odlike Medine



Neka je hvala Svevišnjem Allahu, Koji je Vas odabrao između mnogih ljudi da budete Njegovi gosti. Neka Mu je neizmjerena hvala što ste stigli hairli nakon dugog, napornog puta. Dobrodošli u Medinu Muneveru, Grad svjetlosti, u:

Grad kojega je Allahov Poslanik, sallallahu alejhi ve sellem izuzetno volio: „*Moj Allahu, učini da volimo Medinu koliko volimo Mekku, ili više od toga!*“ (hadis)

Grad kojega čuva Svemogući Allah: „*Na ulazima u Medinu bdiju meleki, u nju ne može ući ni kuga ni dedžal*“ (hadis)

Grad za čije će se strpljive stanovnike, ali i za ljude što u njoj presele zauzimati Resulullah, sallallahu alejhi ve sellem, na Sudnjem danu

Grad iz kojega se proširilo ispravno vjerovanje, i u kojega će se ponovo vratiti: „*Zaista se vjerovanje povlači u Medinu kao što se zmija povlači u svoju jazbinu*.“ (hadis)

Grad određen da bude Resulullahovo, sallallahu alejhi ve sellem, pristanište i glavni grad prve islamske države

Grad u kojem je živio Vjerovjesnik, sallallahu alejhi ve sellem, pravedne halife, ashabi i sljedbenici ispravne tradicije

Grad velikih islamskih znamenitosti i historijskih mjesta: Resulullahova, sallallahu alejhi ve sellem, džamija, mesdžid Kuba, mesdžid El-Kibletejn, Uhud, Hendek itd.

Dragi naši gosti, za ovaj sveti grad vežu se i određeni adabi, kodeks ponašanja na koje bismo trebali obratiti pažnju. Neki od njih jesu sljedeći:

Postupati prema Resulullahovom, sallallahu alejhi ve sellem, sunnetu i kloniti se novotarija: „*Ko u Medini učini grijeh ili uvede novotariju ili podrži novotara, neka je nad njim prokletstvo Allaha i meleka i svih ljudi.*“ (hadis)

Nastojati klanjati što više namaza u Poslanikovo, sallallahu alejhi ve sellem, džamiji, kako bi se postigla nagrada: „*Namaz u mojoj džamiji vrijedi koliko hiljadu namaza na drugom mjestu, osim namaza obavljenog u mekanskom haremu.*“ (hadis)

Strpiti se na neugodnostima i mogućim poteškoćama za vrijeme boravka u Medini, nadajući se obećanoj nagradi: „*Bit će zagovornik na Sudnjem danu svakom čovjeku iz moga ummeta koji se strpi na poteškoćama koje nosi Medina.*“ (hadis)

Paziti da se ne uznemiravaju drugi muslimani i da im se ne učini nažao: „*Ko stanovnicima Medine bude želio zlo, Uzvišeni Allah će ga na ahiretu istopiti u vatri kao što se istopi so u vodi.*“

Znati da se za Resulullahovu, sallallahu alejhi ve sellem, džamiju vežu određeni propisi i o njima treba voditi računa: ući u nju desnom nogom a izaći lijevom i tom prilikom proučiti dovu (iz četvrtog poglavlja), klanjati dva rekata tehijjetul-mesdžida prije nego se sjedne, posjetiti Resulullahov, sallallahu alejhi ve sellem, kabur i tom prilikom reći: ES-SELAMU ALEJKE JA RESULEALLAH VE RAHMETULLAHI VE BEREKATUHU; nakon toga nazvati selam Ebu-Bekru i Omeru, radijallahu anhum.

Potruditi se da se obave dva rekata nafile u mesdžidu Kuba: „*Ko se propisno očisti i pođe u mesdžid Kuba, te u njemu klanja dva rekata imat će nagradu kao da je obavio umru.*“ (hadis)

Bar jednom posjetiti mezarje El-Bekia i moliti za muslimane što su tamo ukopani, tim prije jer je to praksa

dragog Resulullaha, sallallahu alejhi ve sellem. Naime, Aiša, radijallahu anha, pripovijeda da bi Poslanik, sallallahu alejhi ve sellem, uvijek kada bi noćio kod nje odlazio na El-Bekiu i molio za umrle.

Po mogućnosti posjetiti šehidsko mezarje na Uhudu i moliti za njih.

Propisi hadža i umre



Poštovani hadžija i hadžinice, ne sumnjamo da iskreno želite da Vaš hadž bude mebrur, ispravan i primljen, otuda ne biste trebali zaboraviti veliku Allahovu blagodat kada je Vas odabrao da budete Njegovi gosti, da obavite peti temelj Islama – hadž. Brojni su hadisi u kojima Resulullah, sallallahu alejhi ve sellem, ukazuje na vrijednost hadži mebrura. Jedan od njih, možda i najpoznatiji, jeste sljedeći: „Za hadži mebrur nagrada je Džennet.“

Uvjeti ispravnosti hadža i umre

Da bi ibadet (hadž) bio ispravan, time i primljen kod Svemogućeg Allaha mora ispuniti dva osnovna uvjeta:

Da se obavi iskreno, u ime Allaha, dželle šanuhu, odnosno, da čovjek time ne želi ničiju pohvalu ni ugled ni kakvo zvanje

Da ibadet obavi onako kako ga je obavio dragi Resulullah, sallallahu alejhi ve sellem, jer Svevišnji Allah prima samo djela koja su u skladu sa sunnetom

Otuda nam je velika čast i zadovoljstvo da našim dragim hadžijama ponudimo mini-priručnik obreda hadža, kako bi u svako vrijeme pri ruci imali informacije šta i kako dalje činiti. I pored toga se nemojte ustručavati da pitate Vaše vodiče u vezi s hadžskim obredima.

Vrste hadžskih obreda

Postoje tri načina obavljanja hadža i svaki je utemeljen Šerijatom. Čovjek može izabrati koji od tri načina će obaviti, s tim što je Resulullah, sallallahu alejhi ve sellem, podsticao ashabe da obavljaju hadž temettu.

TEMETTU je vrsta hadža koja podrazumijeva obavljanje umre u hadžskim mjesecima (ševval, zul-kade i zul-hidže) i to prije početka hadžskih obreda, a potom (u istoj godini) obavljanje hadža. Dakle, da bi se hadž smatrao temettuom mora ispuniti te uvjete. Nijet za temettu glasi: Lebbejke Allahumme umreten, a onaj ko obavlja ovu vrstu hadža zove se mutemetitia.

KIRAN je vrsta koja podrazumijeva donošenje jednog nijeta za hadž i umru, odnosno, donošenje nijeta za hadž a naknadno (u putu) za umru ili obrnuto. (Ova je vrsta najmanje zastupljena tim više što je njena karakteristika vođenje kurbana sa mikata do Mekke.) Nijet za kiran glasi: Lebbejke Allahumme umreten ve hadždžen, a onaj ko obavlja ovu vrstu zove se mukrin.

IFRAD je obavljanje hadža bez umre. Nijet za ifrad glasi: Lebbejke Allahumme hadždžen, a onaj ko obavlja ovu vrstu zove se mufrid.

Odlazak na mikat, oblačenje ihrama i nijet

MIKAT je granica na putu za Mekku koju ne smije preći onaj ko želi obaviti umru ili hadž a da prethodno nije obukao ihrame i donio nijet. Ukupno postoji pet mikata. Mikat na kojemu se zaustavljaju muslimani iz Evrope zove se Zul-Hulejfa.

Sunnet je da se čovjek okupa na mikatu (kao što se kupava od dženabeta). Ovo je sunnet za muškarce i žene, čak i za one što imaju mjesečni ciklus. Nakon kupanja muškarac oblači ihrame. Za ženu nije predviđena posebna odjeća za tu priliku, već oblači džilbab i šamiju, vodeći računa da odjeća ne bude tijesna, prozirna i da ne bude šarena, da privlači pažnju stranih muškaraca. Tada se donosi nijet u srcu i izgovara riječima, čime i počinje učenje telbije (muškarci povišenim tonom, žene tiho):

LEBBEJKELLAHUMME LEBBEJK, LEBBEJKE LA
ŠERIKE LEKE LEBBEJK, INNEL-HAMDE VEN-
NIMETE LEKE VEL-MULK, LA ŠERIKE LEKE.

Obredi hadža su počeli i na snagu stupaju sljedeće zabrane, za muškarce i žene:

- Skraćivanje i brijanje dlaka po tijelu, također i rezanje noktiju
- Upotreba mirisa i svega u čemu ima doza mirisa (sapuni i sl.)
- Lov i ubijanje divljih životinja
- Spolno općenje i strastveno dodirivanje supruge
- Sklapanje braka, prošnja i posredovanje u tome
- Nošenje rukavica

A muškarcima je još zabranjeno da pokrivaju glavu (suncobran, kišobran i sl. ne smeta), da oblače ma kakvu odjeću osim ihrama (košulju, pantalone, donji veš i sl.), dočim ne smeta stavljanje pojasa i torbice, u svrhu čuvanja novca, dokumenata i sl.

Tavaf i saj

Po dolasku u Mekku, hadžija odlazi u Haremi-šerif, da obavi tavaful-kudum. Za tavaf je potreban abdest. Počinje od Crnog kamena, a ima sedam krugova. Hadžija treba da dodirne Crni kamen desnom rukom i poljubiti ga, a ako to nije u stanju zbog gužve, okrenut će se prema njemu i, dignute ruke, dlanom pokazati u njegovom pravcu i reći: BISMILLAH, ALLAHU EKBER. (Tačno je da je Crni kamen džennetski kamen, kako kaže hadis, ali i pored te specifičnosti ne može pribaviti nikakvu korist niti može otkloniti ikakvu štetu. Omer, radijallahu anhu, ljubeći ga, govorio je: „Ja znam da si ti običan kamen, niti možeš pribaviti kakvu korist niti možeš otkloniti ikakvu štetu, i da nisam vidio Resulullaha, sallallahu alejhi ve sellem, da te ljubi, ne bih te poljubio.“) Kada dođe do Jemenskog ugla (čabenski ugao koji prethodi Crnom kamenu) dodirnut će ga, ako bude mogao, u protivnom će nastaviti ne pokazujući rukom prema njemu. Između Jemenskog ugla i Crnog kamena sunnet je učiti:

RABBENA ATINA FID-DUNJA HASENETEN, VE
FIL-AHIRETTI HASENETEN VE KINA AZABEN-NAR.

U toku tavafa se može učiti Kur'an, učiti zikr i moliti raznim dovama. A u toku tavafa treba voditi računa o dvije stvari:

Idtiba, a to je da se tokom tavafa otkrije desno rame, i ovo se odnosi samo na muškarce.

Reml, a to je da se ubrzaju koraci u prava tri kruga. I ovo je propisano samo muškarcima i treba ga praktikovati ako uvjeti dopuštaju.

Nakon tavafa sunnet je klanjati dva rekata iza Mekami-Ibrahima. Ako je gužva, namaz se može obaviti na bilo kome mjestu u Haremu. Sunnet je na prvom rekatu učiti suru El-Kafirun, a na drugom suru El-Ihlas.

Nakon toga odlazi na Safu, da obavi saj. Popet će se na nju toliko da vidi Kabu, dići ruke i moliti Svemogućeg Allaha za dobra ovoga i budućeg svijeta. Resulullah, sallallahu alejhi ve sellem, na Saffi je učio dovu:

„LA ILAHE ILLEALLAHU VAHDEHU LA ŠERIKE LEHU, LEHUL-MULKU VE LEHUL-HAMDU VE HUVE ALA KULLI ŠEJIN KADIR. LA ILAHE ILLEALLAH VAHDEHU, ENDŽEZE VADEHU, VE NESARE ABDEHU VE HEZEMEL-AHZABE VAHDEHU.“

Dovu proučiti tri puta, a između toga moliti Svevišnjeg Allaha za potrebe ovoga i onoga svijeta.

Tada se upućuje prema Mervi. Muškarac u toku saja trči ujednačenim koracima između zelenih svjetala, a žena hoda. Kada dođe na Mervu i okrene se prema Kabi, proučit će isto

što je učio na Safi, čime je upotunio jedan „krug“. Povratak na Saffu je drugi „krug“ i obavlja se identično prvom. Saj se završava na Mervi.

Nakon saja muškarac će obrijati glavu ili se podšišati, a žena će odjeći vrhove kose ili malo više od toga.

Ovim je umra obavljena, ihrami se skidaju, a sve predašnje zabrane prestaju važiti. Ali, oni koji su se opredjelili za ifrad ili kiran ostaju u ihramima, otuda, ihramske zabrane za njih i dalje važe.

Odlazak na Minu i Arefat

Sunnet je da hadžije osmog zul-hidžeta pođu na Minu. Oni koji su prethodno obavili umru ponovo oblače ihrame u hotelima i izgovaraju nijet za hadž: **LEBBEJKE ALLAHUMME HADŽDŽEN**. Dočim oni mufridi i mukrini nastavljaju sa telbijom. Na Mini će klanjati podne, ikindiju, akšam, jaciju te sabah devetog zul-hidžeta. Namaz neće sakraćivati niti spajati. Toga, devetog dana, sve hadžije moraju biti na Arefatu, tim prije jer je boravak na Arefatu jedan od ruknova hadža, i ko ga propusti ničim ne može nadoknaditi: njegov je hadž definitivno neispravan. Na Arefatu će skratiti i spojiti podne i ikindiju u podnevskom vremenu. Od tada do akšama treba što više ibadetiti: čitati Kur'an, učiti zikr i dovu. Resulullah, sallallahu alejhi ve sellem, na dan Arefata mnogo je ponavljao sljedeći zikr:

LA ILAHE ILLEALLAHU VAHDEHU LA ŠERIKE LEHU, LEHUL-MULKU VE LEHUL-HAMDU VE HUVE ALA KULLI ŠEJIN KADIR.

Po zalasku Sunca hadžije polaze na Muzdelifu. Tamo će spojiti akšam i jaciju-namaz, a jaciju-namaz će klanjati skraćeno; akšam-namaz se klanja tri rekata. Sunnet je zaspati odmah nakon namaza, kako bi se čovjek pripremio za obaveze koje ga sutra dan čekaju. Nakon sabah-namaza lijepo je provesti vrijeme u dovi. Prije izlaska Sunca hadžije polaze na Minu.

Umjesno je napomenuti da je starijim osobama i iznemoglima (kao i njihovim pratiocima) dopušteno da na Minu pođu nakon ponoći, ali kamenčiće neće bacati do izlaska Sunca.

Obredi na Mini i hadžski tavaf (tavaful-ifada)

Po dolasku na Minu, prvog dana Bajrama, bacaju se kamenčići na velikom džemretu (zadnje džemre u pravcu Mina-Mekka). Baca se sedam kamenčića, koji treba da budu nešto manji od lješnjaka. Sunnet ih je baciti desnom rukom i svaki se baca posebno uz riječi: ALLAHU EKBER. Važno je da kamen upadne u krug, a nije obavezno da pogodi zid.

Nakon ovog obreda mutemettia i mukrin kolju kurban, briju glavu ili se šišaju, a mufridi nisu obavezni prinjeti žrtvu. Time sve ihramske zabrane prestaju, osim spolnog odnosa.

Zatim se odlazi u Harem radi obavljanja tavaful-ifade, jednog od ruknova hadža. Mutemettia nakon tavafa obavlja saj između Safe i Merve, a i mukrin i mufrid tada obavljaju saj, ako ga već nisu obavili sa tavaful-kudumom. Nakon ovoga je dopušten čak i spolni odnos.

Po završetku ovih obreda hadžije se vraćaju na Minu, gdje će provesti 11. i 12. noć zul-hidžeta. Drugog i tećeg dana

Bajrama bacaju kamenčiće na sva tri džemreta i to nakon što Sunce pređe zenit. Bolje je kamenčiće bacati prije zalaska Sunca, iako je dopušteno poslije, posebno u velikim gužvama, kada je bolje da se čovjek ne izlaže neprijatnostima. Bacanje počinje od malog džemreta, zatim dolazi srednje, pa veliko džemre. Sunnet je nakon bacanja poći malo naprijed te stati i učiti dovu. Na velikom džemretu dova se ne uči.

Dopušteno je Minu napustiti 12. dana, nakon bacanja kamenčića, pod uvjetom da se iz njenih granica (omeđenih velikim znakovima) izađe prije zalaska Sunca. Koga zalazak Sunca zatekne u granicama Mine, mora ostati i 13. dan i bacati kamenčiće.

Ovim su obredi hadža završeni, ali hadžije su obavezne da, pred sami povratak kući, obave oprosnu tavaf. Žene koje bude imale mjesečni ciklus ne obavljaju ovaj tavaf.

Molimo Svernogućeg Allaha da primi naša dobra djela i da nas uvede u okrilje Svoje milosti na Sudnjeme danu, kada neće koristiti ni imetak ni sinovi.

Propisi hadža za žene



S obzirom da se žena u životu susreće sa pojavama svojstvenim samo njoj a koje utiču na način obavljanja hadžskih obreda, ovdje ćemo našim uvaženim sestrama, hadžinicama, ponuditi fetve savremenih islamskih učenjaka koje tretiraju te probleme.

Pitanje: Prošla sam mikat a nisam zanijetila hadž jer sam imala mjesečni ciklus. U Mekki je ciklus prestao i tada sam zanijetila hadž. Da li sam ispravno postupila?

Odgovor: Pogriješila si, tim prije jer ženi koja pođe na hadž ili umru nije dopušteno proći mikat a da ne zanijeti obrede čak imala mjesečni ciklus. Dokaz za to jeste slučaj sa Esmom b. Umejs kada se porodila na Zul-Hulejfi, pa je tražila uputstvo od Resulullaha, sallallahu alejhi ve sellem. Poslanik, sallallahu alejhi ve sellem, joj je rekao: „Okupaj se, a na stidno mjesto stavi nešto što će spriječiti oticanje krvi, zatim zanijeti obred.“ Krv nakon porođaja tretira se kao krv mjesečnice, otuda, isti propis važi za postporođajni ciklus (nifas) i mjesečnicu. Dakle, žena u tome periodu će higijenskim uloškom ili vatom spriječiti oticanje krvi, a potom će zanijetiti obred, međutim, neće ulaziti u Harem niti će tavafiti oko Kabe. Ovo zato, jer je Resulullah, sallallahu alejhi ve sellem, rekao Aiši, radijallahu anha, koja je imala mjesečnicu tokom umre: „Čini sve što čine hadžije, ali nemoj tavafiti oko Kabe dok ti ne prestane mjesečni ciklus.“ Ako se desi da žena dobije ciklus nakon što završi s tavafom a prije saja, tada može učiniti saj, jer za njega nije potrebna čistoća.

Pitanje: Da li je predviđena posebna odjeća u kojoj žena mora zanijetiti obrede umre ili hadža?

Odgovor: Kada želi obaviti obrede umre ili hadža, žena treba da se obuče onako kako se oblači za namaz. Šerijat nije predvidio posebnu odjeću za tu priliku. Nije predviđena ni bijela boja, iako mnogi misle da jeste. (Muškarcima su predviđeni ihrami, i bolje je da budu bijele boje.)

Pitanje: Kako se tretira spolni odnos nakon nijeta za umru u sklopu hadža temettu?

Odgovor: Ako se to desi nakon nijeta a prije obreda umre, umra je pokvarena i obaveza joj je da zakolje kurban kao iskup (keffaret) za taj prijestup, ali se mora i vratiti na isti mikat i ponovo zanijetiti umru. A ako se takvo nešto desi nakon tavafa i saja a prije skraćivanja kose, umra je ispravna s tim što mora nahraniti šest siromaha ili zaklati kurban ili postiti tri dana.

Pitanje: Da li je ženi dopušteno da se miriše dok je u obredima? Da li je dopušteno da uzima pilule za spriječavanje mjesečnog ciklusa kako bi nesmetano obavila obrede? I da li tokom obreda može nositi zlatni nakit?

Odgovor: Korištenje mirisa tokom obreda je zabranjeno i ženama i muškarcima. Ženi je dopušteno da uzima pilule za spriječavanje ciklusa ako je sigurna da to neće negativno uticati na njeno zdravlje. Dopušteno je da nosi zlatni nakit tokom obreda s tim što je zabranjeno da nakit pokazuje pred strancima, ljudima koji joj nisu mahremi.

Pitanje: Da li je ispravan hadž žene koja dobije mjesečni ciklus tokom obreda?

Odgovor: Njen je hadž ispravan. Obavljat će sve obrede osim tavafa i namaza. Ako se ciklus pojavi prije oprosnog tavafa (a mora putovati) neće ga obaviti i sa nje ta dužnost potpuno spada.

Pitanje: Kako će postupiti žena koja nakon što zanijeti hadž dobije mjesečni ciklus?

Odgovor: Može obaviti jednu od tri vrste hadža: temettu, ifrad ili kiran. Ako obavlja temettu, već je pod obredima umre i ostat će pod tim nijetom. Ako se ciklus završi prije Arefata, okupat će se i obaviti umru, te će zanijetiti hadž i poći na Arefat. Međutim, ako ciklus ne prestane prije odlaska na Arefat tada će promijeniti nijet u hadž kiran (hadž i umra zajedno): ALLAHUMME AHREMTU BIL-HADŽDŽI VEL-UMRETI. Otići će na Arefat, a nakon toga će obaviti samo jedan tavaf i jedan saj, što će biti dovoljno za hadž i umru, osim što će biti obavezna da zakolje kurban. A ako se već opredijelila za kiran ili ifrad pa zbog ciklusa ne mogne obaviti tavaf prije Arefata, odgodit će ga do povratka sa Arefata, kada prestane ciklus, a njen je hadž ispravan.

Pitanje: Ako žena zbog mjesečnog ciklusa ne mogne obaviti hadžski tavaf (tavaful-ifada) a dođe vrijeme da putuje iz Mekke šta će učiniti, budući da je taj tavaf sastavni dio hadža, a ona ne može ostati dok se ne očisti niti se može naknadno vratiti da ga obavi?

Odgovor: U situaciji kada žena ima mjesečni ciklus a mora putovati i ne može se naknadno vratiti da obavi tavaf, može da postupi na jedan od sljedeća dva načina: prvi, uzet će pilule za zaustavljanje odljeva krvi, zatim će se okupati i tavafiti, i, drugi, oticanje krvi će spriječiti higijenskim

uloškom, zatim se okupati i tavafiti, nakon čega može da putuje.

Pitanje: Da li žena koja ima mjesečni ciklus može da opunomoći muža da obavi oprosni tavaf za nju?

Odgovor: Oprosni tavaf nije obaveza za ženu koja ima mjesečni ciklus, ako je obavila hadžski tavaf. Nije dopušteno opunomoćiti nekoga da obavi tavaf za nekoga, bilo hadžski ili oprosni tavaf. Ako muškarac ne obavi oprosni tavaf mora zaklati kurban i podijeliti ga siromasima u Mekki.

Pitanje: Da li je dopušteno bacanje kamenčića za bolesnika i ženu?

Odgovor: To je dopušteno pod uvjetom da oni to nisu stanju učiniti sami. Sposobna žena mora baciti sama, i ako nije u stanju pravog dana Bajrama baciti do podne, učinit će to kasnije, a ostale dane bacat će do zalaska Sunca, a ako ne bude mogla, onda poslije zalaska.

Potrebne dove i zikr



Dova prilikom ulaska u mesdžid

BISMILLAHİ VES-SALATU VES-SELAMU ALA
RESULILLAH, EUZUBILLAHİL-AZİM VE Bİ
VEDŽHIHİL-KERİM VE SULTANIHİL-KADİM
MINEŠ-ŠEJTANİR-REDŽİM, ALLAHUME-FTAH Lİ
EBVABE RAHMETIKİ

(U ime Allaha, neka je mir i spas Resulullahu, utičem se Allahu Velikom, utičem se Njegovom plemenitom licu i Njegovoj iskonskoj vlasti od prokletog šejtana, moj Allahu, otvori mi vrata Svoje milosti!)

Dova između Jemenskog ugla i Crnog kamena

RABBENA ATINA FİD-DUNJA HASENETEN VE
FİL-AHIRETI HASENETEN VE KINA AZABEN-NARİ

(Naš Gospodaru, daj nam dobro na ovome i dobro na budućem svijetu i sačuvaj nas patnje u Vatri!)

Zikr na Safi i Mervi

INNES-SAFFA VEL-MERVETE MIN ŠEAIRILLAH,
FE MEN HADŽDŽEL-BEJTE EV ITEMERE FE LA
DŽUNAH ALEJHI EN JETAVVEFE BIHIMA, VE
MEN TETAVVEA HAJREN FE INNEALLAHE
ŠAKIRUN ALIM. LA ILAHE ILLEALLAHU VAHDEHU
LA ŠERIKE LEHU, LEHUL-MULKU VE LEHUL-
HAMDU VE HUVE ALA KULLI ŠEJIN KADIR. LA
ILAHE ILLEALLAH VAHDEHU, ENDŽEZE
VADEHU, VE NESARE ABDEHU VE HEZEMEL-
AHZABE VAHDEHU.

(Safa i Merva su Allahova časna mjesta, zato onaj koji Kabu hodočasti ili umru obavi ne čini nikakav prestup ako krene oko njih. A onaj koji drage volje učini kakvo dobro djelo – pa, Allah je doista blagodaran i sve zna. Nema boga osim Allaha, Jedinog, Koji nema saučesnika, Njemu pripada vlast i zahvala i On sve može. Nema boga osim Allaha, Koji je obećanje ispunio i roba Svoga pomogao i saveznike sam porazio.)

Dova na Arefatu

LA ILAHE ILLEALLAHU VAHDEHU LA ŠERIKE
LEHU, LEHUL-MULKU VE LEHUL-HAMDU VE
HUVE ALA KULLI ŠEJIN KADIR.

(Nema boga osim Allaha, Jedinog, Koji nema saučesnika, Njemu pripada vlast i zahvala i On sve može.)

Dova kod Mešaril-harama

ALLAHU EKBER, LA ILAHE ILLEALLAHU
VAHDEHU LA ŠERIKE LEHU, LEHUL-MULKU VE
LEHUL-HAMDU VE HUVE ALA KULLI ŠEJIN KADIR.

(Allah je najveći, nema boga osim Allaha, Jedinog, Koji nema
saučesnika, Njemu pripada vlast i zahvala i On sve može.)